

四庫全書

史部

欽定四庫全書

史部

浙江通志卷二百六十五

詳校官給事中_臣戴璐

檢討_臣德生覆勘

總校官編修_臣倉聖脉

校對官庶吉士_臣滿庭筠

謄錄監生_臣姚元烺

欽定四庫全書

浙江通志卷二百六十五

藝文七

書

答車茂安書

晉陸雲

縣去郡治不出三日直東而出水陸並通西有大湖廣縱千頃北有名山南有林澤東臨巨海往往無涯汎船長驅一舉千里北接青徐東洞交廣海物惟錯不可稱

名遏長川以為陂燔茂草以為田火耕水種不煩人力
決泄任意高下在心舉鍤成雲下種成雨既浸既潤隨
時代序官無逋滯之征民無饑乏之慮衣食常充倉庫
恒實榮辱既明禮節甚備為君甚簡為民亦易季冬之
月農收既畢嚴霜隕而蒹葭委林烏祭而蔚羅設因民
所欲獵藪焚林結罝繞堽密網彌山放鷹走犬弓弩發
張鳥不得飛獸不得逸真光赫之觀盤戲之至樂也若
乃斷遏回浦隔截曲隈隨潮進退採蚌捕魚鱸鮪赤尾

鯨齒比目不可紀名膾鯨鰓炙鯨鯢烹石首臠鯢鯢真
東海之俊味肴膳之至妙也及其蚌蛤之屬目所希見
耳所未聞品類數百難可盡言也昔秦始皇四方奇麗
無所不有猶以不如吳會之鄉東觀滄海遂御六軍南
巡狩登稽嶽刻文石留鄮縣三十餘日且彼吏民恭謹
篤慎敬愛官長鞭扑不施聲教風靡

與支遁書

晉
謝安

思君日積計辰傾遲知欲還剡自治甚以悵然人生如

寄耳頃風流得意之事殆為都盡終日感感觸事惆悵
惟遲君來以晤言消之一日當千載耳此多山縣間靜差
可養疾事不異剡而醫藥不同必思此緣副其積想也

上執政書

宋 蘇軾

軾近上章論浙西淫雨颶風之災無策救禦蒙恩旨使
與監司諸人議所以為來歲之備者謹已條上二事軾
才術淺短禦災無策但知叫號朝廷乞寬減額米截賜
工供言狂計拙死罪死罪然三吳風俗自古浮薄而錢

塘為甚雖室宇華好被服粲然而家無宿春之儲者蓋
十室而九自經熙寧饑疫之災與新法聚斂之害平時
富民殘破略盡家家有市井之欠人人有鹽酒之債田
宅在官房廊傾倒商賈不行市井蕭然譬如衰羸久病
之人平時僅自支持更遭風寒暑濕之變便自委頓仁
人君子當意外持護未可以壯夫常理期也今年錢塘
賣常平米十八萬石得米者皆叩頭誦佛云官家將十
八萬石米於烏鵲狐狸口中奪出數十萬人此恩不可

忘也夫以區區戰國公子尚能焚券市義今以十八萬石米易錢九萬九千緡而能活數十萬人此豈下策哉竊惟仁聖在上輔以賢哲一聞此言理無不可但恐世俗諂薄成風揣所樂聞與所忌諱不以仁人君子期左右爭言無災或言有災而不甚積衆口之驗以惑聰明此軾之所私憂過慮也八月之末秀州數千人訴風災吏以為法有訴水旱而無訴風災拒閉不納老幼相騰踐死者十一人方按其事由此言之吏不喜言災者

蓋十人而九不可不察也軾既條上二事且以闕白漕
憲兩司官吏皆來見軾曰此顧當今之至計也然恐朝
廷疑公為漕司地奈何軾曰吾為數十萬人性命言也
豈恤此小小悔吝哉去年秋冬諸郡閉糴商賈不行軾
既劾奏通之又舉行災傷法約束本路不得收五穀力
勝錢三郡米大至施及浙東而漕司官吏緣此愠怒幾
不見容大符往來僚吏恐悚以軾之私意其不為漕司
地也審矣力勝之免去年已有成法然今歲未敢舉行

者實恐再忤漕司恐咎愈深此則軾之疲懦畏人不免
小有回屈之罪也伏望相公一言檢舉成法自朝廷行
下使五穀通流公私皆濟上以明君相之恩下以安孤
危之迹不勝幸甚去歲朝旨免力勝錢止於四月浙中
無麥須七月初間見新穀故自五月以來米價復增軾
亦曾奏乞展限至六月終不報今者若蒙施行則乞以
六月為限去歲恩旨寬減上供額米三分之一而戶部
必欲得見錢浙中遂有錢荒之憂軾奏乞以錢和買銀

絹上供三請而後可今者若蒙施行即乞一時行下軾
竊度事勢若不且用愚計來歲恐有流殍盜賊之憂或
以其狂淺過計事難施用即乞別除一小郡仍選才術
有餘可以坐消災沴者使任一路之責幸甚幸甚干冒
台重伏紙慄戰不宣

上傅崧卿太守書

宋 陳 素

古人設陂湖以備旱歲王仲巖建請以為田乃引鑑湖
自然淤澱已成田陸為說又有不妨民間水利之語其

欺罔甚矣但佃戶占請之初各有畝數不敢侵冒當時湖之為田者才十二三佃戶止於高卬處作塹未敢涸湖以自優民田尚被其利但蓄水不如曩日之多故諸鄉之田歲歲有旱處比年以來冒占不已今則湖盡為田矣以夏蓋湖推之諸處可以類見某所知者止上虞餘姚其他四邑皆不及知新昌嵯縣無上虞餘姚所管陂湖三十餘所而夏蓋湖最大週圍一百五里自來蔭注上虞縣新興等五鄉及餘姚縣蘭風鄉此六鄉皆瀕

海土平而水易洩田以畝計無慮數十萬惟藉一湖灌
溉之利今既涸之為田若雨不時降則拱手以視禾稼
之焦枯耳其他諸湖所灌注皆不下數百頃在餘姚若
汝仇牟山燭溪上林餘支千金漁浦黃山樂安等湖所
溉田動以數百頃植利人戶倚以為命而乃盡奪之一
遇旱膜非惟赤子饑饉僵踣道路而計司常賦虧失尤
多雖盡得湖田租課十不補其三四又況每遇旱歲湖
田亦隨例申訴官中檢放與民田等昨見上虞丞言曾

蒙上司差委相度湖田利害因點對靖康元年建炎元年湖田租課除檢放外兩年共納五千四百餘石而民田緣失陂湖之利無處不早兩年計檢放秋米二萬二千五百餘石只上虞一縣如此以此論之其得失豈不較然民間所損人可見矣但當時以湖田租課歸御前與省計自分兩家雖得湖田百斛而常賦虧萬斛譬倖之臣猶將曰此百斛者御前所得也不創湖田何以有此省計虧羨我何知哉今湖田租課既充經費則漕臺

郡守固當計其得失之多寡而辨其利害夫公上之與民一體也有損於公有益於民猶當為之況公私俱受其害可不思所以革之耶某得之父老云本州之湖其自然可以為田者惟有鑑湖高印去處益不失水利兼與民田亦無相妨其他皆隨湖廣狹以定植利之頃畝尋常湖水平隄旱歲常憂不足頃見李宣州言此利害甚詳而明必曾與執事熟論况執事越人也想前已洞達於胸中君子懷濟民利物之志每恨不得行耳然則

解斯人之倒懸顧不在今日乎某愚意欲望執事斷以不疑除鑑湖外諸縣湖田悉罷之以便民誠不貲之利也然儻侯奏報則湖田皆在四月上旬插種之後若行罷廢似非人情不廢則失今夏蓄水之利故某必冀左右以權宜即日施行一面具利害聞奏仍上章待罪如四聰嘉納則粒米狼戾之慶可坐而致或俞音尚秘則湖以蓄水今歲不得為田足以寬嗷嗷之衆秋間果得一稔則疲民可蘇此事惟在斷而行之失此機會歲事

或虧湖田之租常賦之額兩無所得元元艱食流離道路強者為盜弱者為丐嘯聚弄兵豈不由此執事當自見之知某不為過論也建炎二年春邑民常訴湖田之害於撫諭使者使者下其狀於州縣上虞令陳休錫遂悉罷境內之湖田翟帥以未得朝廷指揮數窘之陳不為變是歲越境大旱如諸暨新嵎赤地數百里農夫無事於鉅父獨上虞大熟餘姚次之其冬新嵎之民糴於上虞餘姚者屬路不絕向使陳令行之不果則邑民救

死不暇况他境乎夫以一縣令尚能為之某之所望於左右宜何如又曰此事如蒙采擇須在三月盡文字到縣設或遲緩不可過四月初二三也蓋此時湖田插種者尚少兼植利人戶須於梅雨前修築隄塘雨作之後難以興工也某三月廿一日舟行湖中詢田父云已種二十之一至月末可種十之一若罷湖田所插之秧當為棄物興大利不可恤小害也左右果欲施行不可先使衆人知之恐刻木得以為市湖田有請數畝為名而

侵占蔓延至百十畝此湖之所以盡為田也前此累有
論訴官中差人打量只是刻木及牙人乞覓租課只仍
原額未嘗增也擅湖利者皆鄉中豪強之人中間上司
體量利害此輩行賄至千餘緡今歲或罷田當有訴課
紛然並至必以已種為詞亦有乞俟收成罷廢者此乃
緩官申行遣至期官吏移易又復請矣惟在台威少加
懲戒毋為浮言所惑幸甚上虞陂湖之為田者共一十
四所其西溪湖等十三所共納租米三千餘石而夏蓋

湖獨管納二千餘石可以見此湖之廣濶係上虞餘姚
兩縣六鄉二萬餘戶植利所係非輕蓋六鄉皆邊海彌
望盡是平陸非如衢婺諸郡間有池塘可以蔭注自興
湖田無歲不早大旱之歲至檢放秋米一萬餘石建炎
二年陳令罷湖田獨此一鄉無一戶訴旱其利害甚明
恐台意以為方朝廷多故又總鄉邦帥權慮事涉太專
未欲盡罷不識可先罷夏蓋湖田否蓋其他諸湖比之
為狹雖州郡行遣不當分彼此然一時權宜救民之所

甚急於理無碍此亦侯雍齒之意民間曉然知惠之將
及我也此已涉第二義恐思其上者而不得故漫及之
某所言儻不鄙斥更當密詢利害條陳以備回鑒時論
列即恐事已迫期不暇草奏乞只以某今所言錄白繳
進苟利於民某雖死不恨

荅湖州守薛士龍寺正書 二

宋 張 栻

論及學校之事此為政之所當先也湖學安定先生經
始當時作成人才亦可謂盛矣聞欲招陳君舉來學中

此固善但欲因程文而誘之讀書則義未正今日一種士子將先覺言語耳剽口誦用為進取之資轉趨於薄此極害事若日於程文之外明義理之分教導涵養使漸知趨向則善也

某前年過霅上時常往拜安定先生墓荆棘幾不通路又牆垣頽圯為人所侵勢有可慮某意謂宜專責教官掌管令一家守之正其封域勿使侵犯是時無可告語今想自賢使君下車之後已留意矣漫及之

上趙丞相書

宋王炎

炎陸沉州縣逾二十年髮既種種不復萌進取之念考
古驗今私計過慮常懷嫠不恤緯之憂然此身孤遠若
不顧狂瞽輒議朝廷事則躡等躡分犯聖賢不韙之戒
是以欲言而不敢近者伏惟朝旨取撥江西常平一十
萬石又下隆興府和糴米二十萬石此州縣利害細民
休戚係焉炎州縣吏也不避誅責引喙一言可乎恭惟
相公以明德茂親專面正朝處伊尹周公之任必能虛

已以受天下之言災為是有激於中不能自默側聞輦
轂之下畿甸之內與兩淮間適歲凶粒米翔貴待哺者
無所告糴若救之少緩則餓殍相視於溝壑所以上動
廟堂之慮轉漕江東西湖湘之宿藏以振其垂絕之命
也然他路與他郡災不敢浮言止以臨安一郡計之倉
司所撥米二萬斛用錢無慮二萬緡浮江入閘苟無風
濤之阻亦必兩月而後至夫民之饑餓有朝夕之急而
轉漕於他郡者積旬踰月恐非救急之策也如曰中都

所藏輔郡所運可解目前之急而他路之所轉運去中都差遠者姑為歲杪來春之用則又不若設策以求商賈之販出大家溫戶之藏可免民饑不必為此擾擾也夫商賈所趨者利也大家溫戶藏粟必待凶歉而後糶者亦利也今不抑米價凡商人興販者沿江諸郡既不得邀阻因明出榜文諭之曰兩淮歲歉米價既貴商賈有能轉販至兩淮者或鹽鈔或茶引或交子或度牒隨其所欲而收糶其轉販已至兩淮者亦然若夫兩浙之

地蘇湖秀三州號為產米去處豐年大抵舟車四出其
豪右之家田廣稅多而倉庾富實者縣邑之吏鄰里之
民固能指數也自臨安若蘇湖秀居人有蓄儲者朝廷
既不抑其價直明以上意諭之曰凡蓄米百萬斛者以
五十萬糶於官降而下十萬斛以五萬斛糶於官或鹽
鈔茶引交子度牒或告身亦惟其所欲計直而售之則
商賈必輻輳而豪右之家亦爭發其所藏矣官高其價
而糶之然後平其價以糶於平民米藏未出其價必高

米來不已其價必賤此公私兩利之策也若夫轉漕他
路常平義倉之米以給中都則未能無害災請詳之今
州縣所通患者常平本錢之少也如臨江一軍去年水
潦相仍官糴常平倉司定價每升七文今漕米萬石費
錢亦近萬緡運二萬石之米有四萬石之費矣常平本
錢之折閱可惜也且天災之流行不可料其無今日一
路錢竭米耗無一歲之備萬一來年二千里為災細
民狼狽郡縣將何以救之乎州縣之倉庾既空矣而一

路和糴凡三十萬石米價既高細民以貴糴為患來年春夏之交新陳未接艱食可知兼之支郡有土瘠民貧去處和糴之後所存無幾他日或有水旱欲勸富民賑糴彼亦何從得米乎當是之時吏無所振救其民强者攘奪弱者流亡緣此坐罪一官不足惜也受命於上職在撫字熟視其民之饑死於心安乎為今之計來他路之商賈諭畿內之豪右得粟米可賑饑民則他路和糴命漕帥二司斟酌可否勿拘定數即其所糴到因以散

於諸州補其所發常平義倉之數元數之外猶有和糴之現存者儲以為他日之備是則兩得之矣伊尹匹夫匹婦不被堯舜之澤若已推而內之溝中相公以伊周之心居伊周之位是以冒犯威嚴而言之惟賜頃刻之暇省覽其說芻蕘雖賤或有一得如蒙鈞慈斟酌施行不勝幸甚干冒鈞嚴無任震越之至

答起巖論潮書

元
吳亨壽

至元十八年秋八月十有八日足下觀潮浙江亭明日

書以遺予若致疑於逆流之水有可詰者朱子註騷謂潮以月加子午之時一日而再至則亦未嘗無說敢為足下誦所聞焉蓋坎本月之體月本水之精月與水一而已矣在天為月在地為水天有陰陽太少而月為太陰地有剛柔太少而水為太柔古人以方諸取水於月其氣類固相感也而况乎子午之位乃陰陽之始於其所始而月加焉則陰與陽感而陰以升陰與陰遇而陰以盛水陰類也當其所加之時湧而逆上從其類也月

一晝夜凡一加午故潮一日再生月一日退天十三度
十九分度之七故潮日遲於一日所以初三之潮晝遲
而入十八之夜十八之潮夜遲而入初三之晝也一月
之間生明生魄潮亦再盛焉生明之潮則自前月二十
六長水謂之起信歷晦朔至月初三謂之大信初四潮
勢漸散謂之落信歷上弦至月十日謂之小信生魄之
潮則自十一始長歷望至十八而盛自十九始殺歷下
弦二十五而衰其起落大小之信亦如之天下之至信

者莫如潮生落盛衰各有時刻故潮得以信言也月於一月之間漸遲而縮一日潮於兩信之內漸遲而縮兩潮秋月最明秋潮最盛亦其理然也又嘗考之坎為月魄離為月魂震生明也兌上弦也乾望卦也巽生魄也艮下弦也坤晦卦也生明之盛非無故而盛也坤一索而得長男故盛過兌少而往則衰矣生魄之盛亦非無故而盛也乾一索而得長女故盛過艮少而往則衰矣驗之於月參之於卦潮之理其殆庶幾乎或曰誠如是

則陽之盛莫如乾陰之盛莫如坤潮不於是焉大而顧
大於震明巽魄何耶曰茲又先天後天之說也不本諸
先天無以見造化之全體不參諸後天無以見造化之
妙用先天之卦體也乾坤離坎位於四正震巽艮兌位
於四維而月之周天實配之後天之卦用也退乾於西
北退坤於西南父母老而不用而長男代父長女代母
居東南生長之方天地間萬事萬物咸於此乎權輿故
其為氣也莫盛焉而潮之大信實配之月配其體則陽

為明陰為魄而乾坤當望晦之位乃陰陽之極也潮配
其用則長為盛少為衰而震巽當大信之後乃陰陽之
長也夫如是則其不乾坤而震巽也有由矣或又曰亦
何以知其必取於卦耶曰以納甲家啓之納甲者如生
明之月昏出於庚震則納庚生魄之月晨見於辛巽則
納辛之類是也陰陽者流用之率驗則月與卦相為用
也審矣潮而有取於月也不亦有取於卦乎哉或又曰
月之說然耶則潮之為侯亦宜月半以前由微漸大月

半以後由大漸微以象夫三五而盈三五而虧可也今
乃於明魄之生兩盛焉何哉曰明魄之盛固已如前所
云然月一月一週天而一日之內則一加子一加午者
也潮於月加子午之時一日再至故亦於月生明生魄
之日一月而再盛焉月之一潮之再若不相似而實相
感召非深於理者未易以語此或又曰子所論浙江潮
也他江亦有潮其遲速不同何與曰潮之生必生於月
出之海浙江之去海為近故其至也如時他江所去有

遠近故所至有遲速耳或又曰古今言潮者必推浙江亦謂銀山雪屋有類數丈此為異耳他江之潮第如湧水復與此不同何與曰浙江去潮生處近掀天沃日之勢方盛而不可遏赭山龕山橫於江口頓然斂寬就窄其勢必至於衝激奔射也他江去潮生處遠遠則必殺故但湧水而已又何疑焉

上郡守洪覺山救荒書

明侯一元

夫救荒恒言其一曰平價平價者欲令凶歲用樂歲之

價也糶者有餘糶者不足損有餘補不足故曰平此善
政也愚竊以為欲平者仁君之心也而不平者物之情
也書曰惟齊非齊故必以平寓之不平而後可幾也昔
耿氏常平之法穀賤則增價以糶貴則減價以糶此在
官者也若民則惟害之避惟利之就有父母所不能諭
君長所不能制者乃天性也昔范文正知杭州歲饑穀
貴至斗百二十文范公更增其價至百八十文告諭遠
近於是米商大集價亦隨減包孝肅知廬州亦不限米

價米更以賤此固以誘致境外之米然可以推見人情誠價貴有利則境內之米亦必不煩告戒而自出矣常平所謂增價減價者蓋就時價而稍增減之故曰價平而止若豐凶獨守一價則何所用其增減而又何平之有哉夫以官府之粟無愛於民猶必隨時低昂其勢然也況在民者乎今境外之米或不可望境內之米亦宜用時價而少損之庶幾民之從之也輕其猶有不從者然後勸粟之令可時下也其二曰勸粟勸粟者亦平糴

之意但其權稍出於上所以開民之固吝教之以相生
相養之道亦善政也愚竊以為勸粟之意本欲以有餘
補不足也然凶年非巨富之家鮮有餘粟中富以下則
足以自給而已責中富以巨富之事是使舍其父母妻
子之養以養人非補助之本指矣江浙之民其貧富以
田為差故欲辨其產者惟按其田則可知也愚以為諸
有田數十頃者為定其高下之差使以差出粟官為主
其價用時直而稍損之若令所謂勸借者則粟有定數

猶愈於鄉民無已之求也輸之於上猶愈於人自為政之舛也如是民必樂之其五頃以下至一頃者勿賦以粟而亦不得受粟此其與責民自料其產自出其粟者相懸矣蓋使小民呈報則有倚富誣貧之奸使富人自糶則又有冒妄不實之奸而其甚可憂者小民羣輩自入富人之家爭以攘奪為事法不可勝則為亂之漸也此俗一成中人以上人人自危矣又所謂饑民者謂其無田可耕無家可倚而今皆推牛酺酒攘袂奮臂相與

約誓而為饑民而其無田無家者反不能自列於上則是善人長饑惡人長飽彼惡少年不喻上之德意方且以為衣食之本惰其所有事而趨之傷化之大者也其三曰閉糴閉糴者非先王之法然今之郡國各有分地人惜其穀人愛其民百郡皆然而一郡獨否則病何者無入而有出也故閉糴亦為不得已之政愚竊以為天下一家均為生民以為郡之廣必有有餘不足之處因而通之則俱全之道是以先王禁遏糴也四海譬一郡

一方譬一縣方今開糴之政在列郡行之則不得已也何也以他郡之政他郡制之也在縣邑行之則仁政必有壅遏偏枯之患矣何以一郡之政制於一人也就一郡而言之則諸縣豐歉不同矣就一縣而言之則諸鄉豐歉不同矣譬之決渠水以救涸澤渠雖稍減澤亦得滋水平自止渠澤兩利非必竭渠以附澤也凡人之情先自為後為人誠使五縣之間各得流通相為出入則其出者必有餘者也入者必不足者也不待為之却

慮而民自得久之則五縣若一而仁無不貫矣愚小子竊謂涓塵以必赴為勤海嶽以并容為大伯宗多知而梁山之議乃効於將車之役夫威王明主而治齊之理乃發於自售之醜女古之賢若此者非一蓋以議有不可用而言無不可容則人自竭而理必具矣伏見明公哀矜之心浹於窮民明威之治訖於豪猾令無不行法有必用將以兼舉周官恤貧安富之政而并包五縣之民此千載一逢也故某自忘其將車求售之陋而欲有

獻於深哲遠聽之前誠珍我子而昧太牢矣伏惟明公
矜而察之幸甚

啓

杭州謝執政啓

宋
蘇軾

小器易盈宜處不爭之地大恩難報終為有愧之人到
郡浹旬汗顏數四湖山如舊魚鳥亦怪其衰殘爭訟稍
稀吏民習知其遲鈍雖尚膺於寵劇庶漸即於安閒顧
此蠢愚亦蒙微倖此蓋伏遇某官輔世以德事君以仁

嘉善而矜不能與人不求其備故令狂直得保始終指
步武於夷途收桑榆之暮景軾敢不欽承令德推本上
心政拙催科自占陽城之考奸容獄市敢師齊相之言
庶寡悔尤少償知遇

答杭州交代啓

宋
蘇軾

罷直禁中本緣衰病分符浙右更竊寵榮既尋少壯之
舊游復繼老成之前躅養疴卧治之所蒙承坐嘯之餘
顧此鈍頑實為忝昧伏惟宏才緯俗雅望鎮浮神馳方

切於望塵心照已申於傾蓋借之餘潤成此虛名滕大夫之才豈堪治劇楚令尹之政或許告新望見有期瞻
依愈切新易節旄光臨督府舊政已孚於千里先聲坐
振於七州軼偶以庸虛適相前後愧無毫髮之善可紀
斯民惟有凋瘵之餘以遺君子即諧瞻奉尤切詠思

與溫守袁孝正言啓

宋王十朋

襍被殿廬蓋適我願分之始懷章里閭正事其賢者之
時曾族賀之未遑遽朋械之先辱俯懷愧懼仰佩謙沖

某官蘭省魁儒芹宮哲匠卓矣聖賢之學粹然道德之
容議論衷乎古人文章蓋其餘事方權臣用事之日官
冷廣大逮聖主當陽之初席前賈誼擢自臺察處於諫
垣言人之所甚難行吾之所素議首破和議力摧奸謀
有著龜先見之明凜松柏後彫之操君子稱為古遺直
天下傳為真諫官上上固爭挺袂安忠正之節一麾出
守得謝公山水之州上方念之公其歸矣某蒙恩去國
需次還鄉喜父母之邦得神明之政汲長孺雅嘗慕茲

臭味本同王仲宣茲幸依劉幘幘可托

知嚴州謝王丞相啓

宋
陸游

故里浮沉竊玉局再期之祿公朝杖拭付桐江千里之
民瓜戍非遙竹符甚寵感淪病骨愧溢衰顏伏念某元
祐黨家紹興朝士池魚淺濶本思自放於江湖社櫟支
離久已難施於斤斧由治生之素拙因從宦以忘歸頃
自吳中久留劍外顧彼衣冠之所萃頗以文字而相從
方深去國之悲敢有擇交之意流偶殊於涇渭風自隔

於馬牛睚眦見憎本出一朝之忿排擠盡力幾如九世
之讐藐視羈孤孰為別白縱免投荒之大罰亦宜置散
以終身且定遠未歸誰望玉闕之生入輕車已老猶護
北平之盛秋豈有朝為閭閻廢斥之人暮竊畿輔承宣
之寄茲蓋某官學窮突與勲塞堪輿南山巖巖冠公師
之重任亦歸凡凡同宗社之閔休念人才之實難悼士
氣之不振埏陶正廣收拾無遺方與物以皆春憫向隅
之獨泣變和輿論濶略彞章起安國於徒中較恩未大

還管寧於海外為力尚輕而某少非列於通才晚徒專
於朴學棄雞肋而猶惜惟仰戴於深仁續鳬脰則短才
恐難容於薄命

知嚴州荅交代陳院判啓

宋 陸 游

病求玉局但懷優游卒歲之心恩畀桐廬獲繼超軼絕
塵之跡方自嫌於通問乃劇辱於移書公真快哉我則
陋矣伏念某少而落魄老益迂踈憔悴闕河萬里客岷
嶓之境馳驅節傳三年使閩楚之郊迨此退歸頽然遲

暮投組以安於蟹舍起家忽奉於魚符茲蓋伏遇某官秉
節以貫四時瑞世而翔千仞經行早推於庠序謀猷晚
著於朝廷謠誦上聞豈獨最列城之課規模甚遠又足
為來者之師某偶幸懷章遂將接武雖取棄竹馬望英
躅以憎慙然獲奮青氈在衰門而甚寵發春伊始坐嘯
多間願遵輔養之宜即慶禁嚴之拜

賀浙西漕除總領啓

宋 陳 造

十行芝檢來自層霄一道使權總之碩德省蘭寓直營

柳回春方遠邇之悚聞聚驩謠而載路乘輶問俗孰遵
前日之教條足國裕民行繼昔賢之事業某官稟絕人
之識為名世之儒挺薦紳表而雅推獨行之賢讀古賢
書而不為無用之學棟梁杞梓允謂良材袞繡文章直
其餘事自橫蜚於仕路即妙簡於宸衷百吏革心咸仰
范滂之攬轡列屯宿飽未多葛亮之雜耕況此常暘之
餘良苦轉攘之梗河流如帶千艘銜尾以莫前粒食比
珠萬旅張頤而仰待事有至難顧今乃爾賢必已試然

後用之不有一代非常之才曷振此時兼乏之策輦駕
以輸河內少留子翼以給軍根本之固關中側佇鄴侯
之相國要令元勲之冠列辟豈止再見而位上卿某猥
以郡符撫茲淮俗久依風於德宇今賴寵於使臺聞嘉
命之真傳撫微躬而知幸成於自同敗於自異需使指
以趨承滄之不濁澄之不清尚仁人之覆護

湖州謝孟漕啓

宋王炎

鳳闕非遙虎符有守便朝賜對詔旨趨行主上之德意

寬仁臺治之教條簡易於斯撫字可謂便安載念此州
殊非曩日三賢祠在誰希前哲之高風六客堂空無復
宦遊之樂事既紛紛於牒訴又汨汨於簿書征權之利
日取之若甚多金布之輸歲計之常不足何以免催科
之拙庶乎為保障之謀伏遇某官令聞冠於朝端名問
甲於天下以能治劇兼兩道而裕財其實留中近九重
而駐節炎幸緣一日之雅素可竊二天之庇庥雖無御
點馬之嚴稱為能吏願戒烹小鮮之擾加惠齊民

荅長興安吉知縣啓

宋王炎

朱幡蒞事固無取夫煩苛墨綬近民尤貴察其肥瘠欲
為循吏難矣願與執事圖之某官行已靖修執事敏決
方縣官之意雖專期於保障而郡守之責顧在拙於催
科要當處之以中相與去其太甚黃金不至搏手而無
措赤子亦可息肩而少休但使田里無愁嘆之聲不負
朝廷有寬大之意佇觀優課即上亨途聊抒鄙願用酬
先施

通溫州交代沈詹事啓

宋樓鑰

偃藩滄海真有古方伯之風易鎮溫陵庸示東諸侯之
勸乃容賤子獲繼後塵敢言一月之間再辱五雲之貺
撫謙甚矣揣分悚然恭惟某官學貫九流氣高八表天
分已超於凡品心傳自得於遺經嚆道脈詠聖涯信師
友淵源之遠穿天心出月窟仰文章黼黻之工首振宏
綱早膺睿獎游居宰掾遂陟禁途儲寮推商皓之賢朝
望出漢庭之右粵從壯歲已著外庸使節帥垣凜威名

之猶在閩山江國懷惠愛以如斯獨瀛壖未識於旌旄
故上意特分於符竹教條所及掃狡穴以一空政務日
新剔蠹原而欲盡期年而變百堵皆興精力如黃潁川
而事不煩方略如薛馮翊而用自省撫摩多暇賦咏流
傳繡口錦心在昔接王楊之舊風樓月觀從今齊沈謝
之名忽傳舜詔之頒更與泉麾之重佇聞歸奏別拜褒
遷刺史之為三公厥存故事人主之論一相用佐中興
伏念晚生無堪冥行當血氣盛強之際不能大所居之

宮矧父兄憂患之餘豈復有敢為之志茲叨郡紀遽迫
戎期雖惟為養之私未識牧民之道仰惟耆德嘗拜下
風庭內芝蘭已見朱幡之賢守門前桃李居多黃閣之
名臣望重儒先年為父執退慚孤遠敢謂交承瞻之在
前知堅高之可慕矐乎若後豈奔軼之能追尚須修敬
之初躬請告新之益暑風清潤燕寢邃深願精茵鼎之
調仰副冕旒之眷

碑

會稽山刻石

秦
李斯

皇帝休烈平壹宇內德惠攸長卅有七年親軋天下周
覽遠方遂登會稽宣省習俗黔首齊莊羣臣誦功本原
事迹追道高明秦聖臨國始定刑名顯平舊章初平法
式審別職任以立恒常六王專倍貪戾傲猛率衆自強
暴虐恣行負力而驕數動甲兵陰通間使以事合從行
為辟方內飾詐謀外來侵邊遂起禍殃義威誅之殄熄
暴悖亂賊滅亡聖德廣密六合之中被澤無疆皇帝并

宇兼聽萬事遠近畢清運理羣物考驗事實各載其名
貴賤並適善否陳前靡有隱情節省宣義有子而嫁倍
死不貞防隅內外禁止淫佚男女絜誠夫為寄緞殺之
無辜男秉義程妻為逃嫁子不得母咸化廉清大治濯
俗天下承風蒙被休經皆遵軌度和安敦勉莫不順令
黔首修絜人樂同作嘉保太平後敬奉法常治無極輿
舟不傾從臣誦烈請刻此石光陞休銘

謹按金薤琳瑯云至正元年辛巳夏五月望日紹興路總管府推官東平申屠嗣以家藏舊本模勒

置於會稽黌舍庶與嶧秦等文並貽於後但史記
攸長作修長卅字作三十追道作追首又作追守
軌度作度軌有子而嫁作不嫁無辜作無罪敦勉
作敦誠今則俱依石刻以俟好古博雅者考鏡焉

梁相費汎碑

漢費均

梁相諱汎字仲慮此邦之人也其先季文為魯大夫有
功封費因氏為姓秦項兵起避墜於此遂留家焉世業
稼穡好學禮樂大漢之闕官司相繼絕而復續至梁府
君以孝友至行聞於鄉邑邑仕更郡右憲諤實直在公
履法察孝廉除郎中屯騎司馬遷蕭令賑民如子先教

後蜀主默之化奉以忠信守以敦篤在位九年百姓移風苛慝不作奸寇不發變爭路銷推讓道生三年不斷獄禎祥感應時沛有蝗獨不入界由此顯名國以狀聞

朝廷嘉諸拜梁相宣

闕

惠

闕

不帥自正當登台階延究

蜀耆被病遜位春秋八十卒二子慕

闕

鳳由宰府至堂

邑令政九江太守適孫均感矣斯之義刊銘于石旌勒

厥美俾

闕

覽焉其辭曰穆穆顯祖厥德懿鑠播勛於前

丕碩基業遺愛於民福流後祚庶

闕

昌

闕

在

闕

室功

烈休矣末昆戮力

謹按洪适隸釋云右漢故梁相費府君之碑篆額今在湖州費君名汎堂邑令鳳九江太守政之父也鳳以威宗熹平中卒碑載費君二子所終之官此蓋其孫均所立故其銘有穆穆顯祖之句鳳碑云孝孫字元宰生不識考妣追惟厥祖恩蓬首斬衰杖則鳳之子已早卒此所謂均乃九江太守之子得鳳畝一金之產者左傳魯倍公賜季友汶陽之田及費碑作季文誤也

堂邑令費鳳碑

卜引

惟熹平六年歲格亏大荒無射之月堂邑令費君寢疾

卒嗚呼哀哉於是夫人元故

關三

守卜引追誄之辭曰

君體履柔餘溫其如玉修孝友乎閨闕執忠謇於王室

立迹州郡仕更右職舉直措枉強禦闕貸貢孝三署勛

譽有則出宰近甸民懷厥德色斯輕翔翻然高翥王人

述職分闕班爵台闕二招煦鼎調物退已進弟不營榮

祿栖遲厯稔項領滯畜鄣土不庭黔民作卣命君闕二

政化闕行逆善遷恩三期致道有恥且格文守旌功轉

在堂邑垂拱不言而民帥伏三時之間卒以闕洽昊天

不弔命也早歿春秋六十六黎儀瘁傷泣涕連漉豈愛

我躬命不可續臨終迷

闕三字

內發祖業良田畝直一金

推予弟息辭位讓財行義高節卓不可及名實相副有

始有卒

闕二字

善人痛方切惻

謹按洪适隸釋云石漢故堂邑令費君之碑篆額今在湖州費君名鳳自郎中嘗宰新平故鄣堂邑三縣以靈帝熹平六年卒其妻之弟卜君追誄之乃作此碑碑中無名字云之石君詩碑云祖業良田畝直一金推予弟息此固可嘉至於退已進弟不營榮祿則人人之所難其云行義高節卓不可及名實相副有始有卒信哉此云黎儀瘁傷孔寅碑亦云乃綏三縣黎儀以康黎則黎老之稱儀則讀如旄倪之倪也

堂邑令費鳳別碑

漢石勳

君暘家仲孫甘陵石勳字子才載馳載驅來奔亏喪庭
肝摧意悲感切傷心瞻彼碑誄懷之好音司馬慕蘭
相南容復白圭仰之以彌高鑽之而彌堅不堪哀且思
叙詩之一篇庶幾昔子夏起夫子之所言其辭曰君諱
鳳字伯簫梁相之元子九江太守之長兄也世德襲爵
銀艾亞倏遐祖之鴻軌拓前代之休蹤邈逸越而難繼
非羣愚之所頌仁義本於心慈孝著於性言不失典術

行不越矩度清潔皦爾望而不滓恤憂矜危施而不記
由近及遠靡不覆載故能闡令名而雲騰揚盛聲而風
布踐郡右職三貢獻計辟州式部忠以衛上漢安二年
吳郡太守東海郭君以君有逶迤之節自公之操年卅
一舉孝廉拜郎中除陳國新平長神化風靡惠以流下
靜而為治匪煩匪擾乾乾日昃矜此黔首功成事就色
斯高舉宰司委職位思賢以自輔元懿守謙虛白駒以
騶隍丹陽有越寇沒

闕四

命君討理之試守故鄣長蓋

危亂有不讓又畏此之罪罔而闕牧爰止其師旅鴻若

飛鷹鷁銳若夫號虎彊者綏以德弱者以仁撫簡在上

帝心功訓而特紀輶輿宰堂邑期月而致道視闕四遂

據亏卿尹中表之恩情兄弟與甥舅萬與女蘿性樂松

之茂好聞君顯令名舉宗為歡喜不悟奄忽終藏形而

匿景耕夫釋耒耜桑婦投鉤莒道阻而且長望遠淚如

雨策馬循大路褰裳而涉洧悠悠歌黍離黃鳥集於楚

惴惴之臨穴送君於厚土嗟嗟悲且傷每食闕不絕夫

人篤舊好不以存亡改文平感渭陽悽愴益以甚諸姑
咸辟踊爰及君伯姊孝孫字元宰生不識考妣追惟厥
祖恩蓬首斬衰杖世所不能為流稱於鄉黨見吾若君
存剝裂而不已壹別會無期相去三千里絕翰永忼慨
泣下不可止

謹按洪适隸釋云右費鳳別碑刻舅家中孫甘陵
石勳詩一篇其辭云瞻彼碑誄懷之好音謂卜居
所作也其詩先叙世系歷官繼以韻語六十句其
三句六言餘皆五言石君蓋鳳之中表也所述兄
弟甥舅諸姑伯姊夫人孝孫悲傷哀痛之意宛轉
悽切費氏父子三碑今並列於吳興校宮之壁不

知者指此為碑陰趙氏亦有斯誤其中溼而不滓
蓋用溼而不緇鵠若飛鷹鵠若夫鵠虎蓋用聿
彼飛牛闕如鵠虎其字有不
同若非假借則是傳授異也

天台智者大師碑

并序

唐

梁肅

天台山西南隅一峯曰佛隴蓋智者大師得道之所前
大佛教重光之地陳朝崇之置寺曰修禪及隋創國清
廢修禪號號為道場自大師入滅一百八十餘載長老
大比丘然公光昭大師之遺訓以啓後學門人安定梁
肅聞上易名銘勒大師之遺烈以示後世云大師諱智

顓字德安時號智者感緣應迹載在別傳夫治世之經
非仲尼則三王四代之制寢而不章出世之道非大師
則三乘四教之旨晦而不明昔如來乘一大事因緣菩
薩以普門示現自華嚴肇開至雙林高會無小無大同
歸佛界及大雄示滅學路派別世既下衰教亦陵遲故
龍樹大士病之乃用權畧制諸外道乃詮智度發明宗
極微言東流我惠文禪師得之由文字中入不二法門
以授南嶽思大師當時教尚簡密不能廣被而空有諸

宗崩感方夏及大師受之於是開止觀法門其教大畧
即身心而指定慧即言說而詮解脫大中一實相之宗
趣無證真得之妙自發心至於成道行位昭成無相奪
倫然後誕敷契經而會同之煥然氷釋示佛知見窺其
教者修焉息焉蓋無入而不自得焉大師之設教也如
此若夫弛張用舍開闔默語高步海內為兩朝宗師大
明在天光被四表大雲注雨旁施萬物由是言佛法者
以天台為司南殊塗異論往往退息緣離化城示滅茲

山是歲隋開皇十七年也夫名者實之賓教者道之門
大師溷其賓闕其門自言地位示有證入故感而應之
之事可得而知也若安住法界現為比丘等覺與妙覺
與不可得而知也當是時也得大師之門者千數得深
心者三十有二人纂其言行於後世者曰章安禪師灌
頂頂傳縉雲威禪師威傳東陽東陽縉雲同號時謂小
威威傳左溪朗禪師自縉雲至左谿以元珠相付向晦
宴息而已左谿門人之上首今湛然禪師行高識遠超

悟辨達凡祖師之教在章句者必引而伸之後來資之以崇德辨惑不可悉數蓋常謂肅曰是山之佛隴亦鄒魯之洙泗妙法之耿光先師之遺塵爰集於茲自上元寶歷之世邦寇擾攘緇錫駭散可易名建寺修持塔廟莊嚴佛土迴向之徒有所依歸繫衆人是賴汝吾徒也盡紀諸文言刻於金石俾千載之下知吾道之所以然小子稽首受命故大師之本迹教門之經明後裔之佳持皆見乎辭其文曰

諸佛出世惟一大事天台教源與佛同致赫赫大師開
示奧秘載弘道要安住圓位白日麗天天下文明大師
出現國土化成無生而生生化兩明薪盡火滅山空道
行五世之後間生上德微言在茲德音允塞明明我后
易名淨域此山有壞此教不極

越州開元寺律和尚塔碑

并序

唐

梁肅

釋氏先律師諱曇一字曇引報年八十一僧夏六十一
以大厯六年十二月七日滅度於越州開元寺遷座起

塔於秦望山之陽制練會葬者以千百數大師本南陽
張氏曾祖隋太常恒始家於會稽之山陰大師誕鍾粹
氣聰悟夙發幼學五經因探禹穴至雲門寺遂依沙門
諒公出家景龍中剃度尋受具戒天縱辨慧益之以軌
儀翕然已為人望矣開元初西遊長安觀音亮律師見
而奇之受以毗尼之學又依崇聖寺檀子法師學俱舍
唯識從即度沙門善無畏受菩薩戒探道覩奧出類拔
萃期月之間名動京師大師崖岸峻峙機神坦邁體識

詳雅應用虛明得三藏之隱蹟究諸宗之源底加以素
解元儒旁總歷緯長老聞風而悅服公卿下榻以賓禮
由是與少保充國陸公象先賀賓客知章李北海邕徐
中書安貞褚諫議庭誨及涇縣令萬齊融為儒釋之遊
莫逆之友其導世皆先之以文行弘之以戒定入蘭室
而馨香自發臨水鏡而毫髮必鑑不知其所由然矣開
元二十六年復歸會稽謂人曰三世佛法戒為根本本
之不修道遠乎哉故設教以尸羅為主取鄴郡律疏合

終南事鈔括其異同詳發正義學徒賴焉大凡北際河
朔南越荆閩西方之宗自我而盛烈炬之破昏羣流
之赴淵澤適來之時行化也如彼有為而生乘化而息
草木潛潤慈雲無心適去之時處順也如此人世遷轉
道存運在瞻望不見寂寥空山銘曰

越水漫漫崇山迴合大師化滅式建靈塔緬慕上士誕
修淨法有威有儀不穿不雜德溥化洽雲從海納勒銘
垂後千萬億劫

杭州開元寺新塔碑

唐
李華

漢永平中佛教初至洛陽始置寺度騰蘭二德古者官
之庭府稱寺蓋賓而尊之比於曹署此其源也杭州開
元寺梁天監四年豫州刺史譙郡戴朔捨宅為寺寺號
方興名僧惠園營建之後處士戴元范賓恭增飾之至
開元二十六年改為開元寺庭基坦方雙塔樹起日月
逝矣材朽將傾廣德三年三月西塔壞凶荒之後人願
莫展太常卿兼杭州刺史張公伯儀忠簡帝心威靜吳

越駐車跪禮徘徊感嘆乃捨清白之俸為君為親修而復之兵部員外郎兼侍御史范公倫人之珪璋國之俊彥法師什曇獻上座什雲卿寺主什崇遠都維那什惠達什法祥長樂寺什曇景等戒香扶其永誓道力護其成功於是劍南荆揚之巨材諸郡臣輸之懿匠竭耗神明三年畢事乙粟結乞穿貫顯氣晃燭景象烘若鎔金距卑躋高凡為七級之有佛事環迴眴轉幢網通映如梵什宮踐乎上府俯視萬井有若綦布仰瞻天宇雲在

身下傍眺江山列在掌端鏤以丹素飾以青紫掀腸閃
目百變百移如有靈物累跪稜層雷鬼攢藥標江壓湖
孤島突天不可名也霞照丹戶如開日宮風搖和鈴若
下天樂聲徹有頂輪蔭空界影入清江形鎮大地所濟
者廣巍巍度門先大德什懷亮住持之固如山不動先
法師什藏暉三藏扁鑰吾方啓之過去人緣在世慈願
不有偈頌其如佛恩華嘗官是邦感深霜露忝太常一
面與兵部為寮敬申其美以佐法門之宏觀其文曰

亭亭揭堅迥出江甸秋天沈寥百里獨見如海浮來如
地涌現以壯州邑以調羣心餌藥解病依舟濟深卿曹
郎署共布黃金

台州乾元國清寺碑

唐

李華

天寶十五載逆將犯關塵翳郊廟上皇哀蒼生避之幸
蜀皇帝誓復君父之恥理兵於朔方避寇仁之盛也復
恥孝之大也惟仁盛孝大故不逾年而收京師奉陵寢
凶孽走而天降之戮化氣和而人至於道魏巍乎堯舜

之烈不足比崇天子齊心元默運行慈煦為元吉卿士
妙講化之宗以為五帝三王之道皆如來六度之餘也
厥初生人降及中古君臣父子日用而不知故元聖昇
竺乾而師有古先生宣尼有言三皇五帝皆古聖者而
西方有聖人其為大千之尊乳育羣聖明矣夫玉帛非
為禮之本捨玉帛則無以為禮象飾豈施教之源捨象
飾則無以為教建塔廟為禮容履霜堅冰物有其漸於
是卿士從兆人從九圍之中列剎相望矣盈川非古邑

也襟東江西山因而城之寺在遠郊信者勞止自官吏
耆耄至於商旅咸以津梁未建為媿為羞邑城之西有
淨名廢寺背連山而面通川杉栝晝暝緇褐經行寒潭
夕清車馬無聲境勝心閒十金果成耆壽徐君贊錄事
徐知古等請於縣令隴西李公平平請於前刺史趙郡
李公丹丹請於河南等五道度支使御史中丞京兆第
五公琦琦聞於天子墨制曰可僧義璿等伏以乾元之
初元惡掃除國步既清廟易名勝因改曰乾元國清寺

昭睿功也自所志洎於州縣之長僚吏以降多捨清白
之俸徵梓人求繪工為民儲福為佛成宮高殿倚雲長
廊生風蓮花出界開在空中自江南無有是刹上座某
等至某都維那某奉前佛之心印得輪王之髻珠第五
公以上智利國人登宰輔李使君以全德公才持憲為
郎今刺史陳郡殷公日用忠武傑出長城江海專知官
司馬隴西李公乾嘉峻能操綱清可激俗縣令李令宗
室大儒政之善者皆易簡詣於真境清淨符於度門醍

酬勝味甘露妙源正性無說弘之在言其詞曰

東裔名利西方樂土吳山倚垣越水當戶檉松黝藹下
有象潭龍在泉中水容耽耽景象光澈江湖氣含天清
寶界地湧靈龕大聖蒸蒸動乎天地百神奔走戎服既
備命將誓師殄殲逆類奉迎太上開闢正位神人釋憤
品物咸遂鼓舞賡歌上通元氣無思不泊雜沓禎瑞輪
帝御寓像法昭融須彌四洲建大蓮宮倬彼盈川秀冠
越中縣有德政州有名公奉宣睿謀爰度崇工梵侶開

士慈雲惠風願言上報聖壽無窮建表勒名堂堂乎鐘

衢州開元觀碑

唐顧况

王太上也謂之三清測神靈也謂之三洞洞之法金璫
玉珮之書玉馬之券迴車畢道天誥也負石填河師誓
也得之者上騰九天失之者下釁十祖故曰萬劫秘而
五千文行蕭武好佛法道士桃欖釋藏徒聊順帝旨強
說為大教佛經故論者短之多稱道家惟有老子兩卷
井蛙不知尾閭也大哉玉皇上極金闕青童紫微扶桑

之君仲侯左靈東華之君人雖位在上清而猶臣妾玉
皇太上已下如陪臣焉凡三十六天三十六洞地道下
通華陽林屋傍通龍丘九巖其土神秀厥生道與徐先
生名含真中書侍郎安貞之族子也傳八景之空文掘
九光之靈符隸乎此觀初棟宇壇墀惟彼瓦礫鬱為草
莽先生之功林堂象設始吐光彩蕭寥同映養屯茹氣
蹈火吞刀之士不可呼而來夫道可不遇文復何昌銘曰
天地未生聖人未作陰陽坎北日月磅礴道隱乎先氣

流形博乃播羣法靈神沃若奔景無天迴元豁落帝作
玉府以般靈居四輔之目三清之書不得其人曠劫秘
諸臣拜稽顙以度寶魄之明浩興

吳越錢武肅王廟碑

唐皮光業

粵以唐長興三載壬辰春季冀凋十三莢天下兵馬都
元帥尚父守尚書令吳越國王棄捐宮館以是歲明宗
皇帝降太常博士段顥定謚議曰武肅詔尚書工部侍
郎楊凝式撰神道碑又宣翰林待制張季恭至吳越書

於刊石後二年歲在敦牂天下兵馬都元帥嗣吳越王
建廟貌於始封之越國禮與境內樂之罔極孝思也蓋
聞神道設教莫大於郊社嚴禋明德惟馨無逾於祖考
孝饗是以百代相襲六籍盛稱報劬勞則天保是徵展
欽若則王假是訓豈况建除難靖亂之業揚武烈之威
名振剛德義氣之風成肅恭之懿號陳力四紀光奉八
朝生為有土之君薨立象朝之廟足可睢盱召畢齷齪
桓文聲華永而日月齊簡冊編而古今在矧夫堂成王

構家繼國祧壓壁寶以知來出玉林而嗣位高陽號里
無愧前賢夏屋登山常遵治命爰自鄭緇始襲晉墨未
除不忍一日之離遂立千年之祀金鎔陽邁已成像於
吳城香刻旃檀復祔神於越國恭惟先天下兵馬都元
帥吳越國武肅王殷朝錢祖仙萼分枝唐代巢公靈源
真派簪裾軒冕禮樂詩書疊慶連華交光翊業應劭七
世累爵重官羅企一門惟忠及孝其降神也虹飛蜀國
如見殊祥魚躍河汾是生奇表赤光耀室黃氣浮雲石

龜隕下於官山遠人附歸於寶器其英姿也鳳文龍藻
夔出精神白璩蒼珪琢為標格加之薛璘整峻謝安風
華俯仰可觀進退有度慕容德偃日月角光彩燦人李
子堅匿犀龜文聲威鎮俗其辭韻也音容灑落智辨鏗
鏘元善抑揚張暢詳雅至若討論國計談畫兵籌接對
使伴撫御將下所謂五河奔注百谷崩騰玉虹起而雲
霧銷金虎嘯而風飈動揣摩勝負赫連勃口授懷慙俾
闔興亡蘇季子舌端有愧其氣度也志尚健木量等大

瀛含垢匿瑕罔知邊際求賢接士無怠寅昏重仁義若
丘山視玉帛如咳唾翹翹車乘惟在得人憧憧往來皆
鍾和氣所以羔皮豹舄鶴列犀渠咸願殺身用酬大志
變家為國誠由萬化生身以德聚民所謂八風從律其
英雄也能知否泰應候雲雷動必有成舉無遺策蛟龍
得雨莫測變通鵬鶚出林可知意度其間文武迭用仁
義並施常平之列戟持矛並能取舍元協之搦蛇騎虎
不覺艱難奄有具區廓開霸業設使庾翼復出必不忘

譽於桓溫阮籍今生安敢輕言於廣武其文學也家承
儒範世尚素風傳絳紗帳於先生授白綸巾於神女才
通夢寐鳳吐是來志在典經龍鬪不顧所以博覽七緯
精究三元盡得津涯皆升堂奧其於編咏尤著工夫思
風起而繡段飄言泉淘而金沙見其札翰也花隨腕下
星逐毫飛迅若游雲細凝垂露鉤刀向背未饒索肉芝
筋點畫方圓高掩崔肥趙瘦就中濡染脾額益見呈露
鋒鋷四方仰之神蹤一代稱之墨寶王逸少若見甘避

雁行蕭子雲如逢大慚蟬翼其建大功也唐季乾符之
末中和之初海鳧乍揚天龜初伏塵飛野馬四郊之壘
漸多霧暗螭蛇五賊之機共構其始者王仙芝結釁中
土首構禍階雖已誅夷猶殘支黨自此藁林烏食草澤
蜂飛輕薄者固自披攘謹厚者亦為慄悍江南則朱直
叛亂於唐山孫端寇孽於安吉西侵宛水東患荅溪郡
縣則終日登陴生民則長時伏莽王時郊居葛圃家遁
茅山方當枕石漱泉尚足褒衣博帶覩茲多事慨然究

懷顧謂朋友曰大夫當須撥亂平姦豈可懷安端坐是日乃奮戎服挂披儒冠大散家財廣招勇士中令纔舉行伍肅然手仗義旗身當勅敵一月之內二寇殄平靖千里之山川救兩郡之塗炭是王之初功也其次黃巢來從五嶺直下三衢展梟翅則電布星羅張鯨牙則山連岳峙所遭蹂躪並作塵灰王乃獨領偏師橫行險地既逢大憝遂設奇兵敵望草木叢林皆是戈矛旗幟我則左右翼陣默化如神當下追奔尚賈餘勇長蛇封豕

使出他疆新市下江保安數邑是王之次功也其次彭
城漢宏據南鎮之望地守東越之名區黃巢既犯兩京
僖王乃巡二蜀漢宏不思奔問便廢貢輸恃險阻於浙
河欲覬覦於浙岸先於通浦龜石翼張下營蕭山西陵
鱗次列砦烽燧交應鼙鼓相聞時我諸軍實有難色王
乃潛趨間道夜濟長江仰告昊天乞昏朗月當下寒雲
布野殺氣凝空楚廟陰兵旁隨霧合晉臣黑幔闇與山
連我師忽震於雷霆彼砦俄摧於魂夢風號貔虎爭傳

破竹之聲陣卷龍蛇競集建瓴之勢賊將沒輪不暇漂
杵有餘僅身免以奔歸乃塞門而自守爾後大小百戰
首尾四年方清鏡水之波始有蘭亭之地弔其生聚大
布仁慈誅彼渠魁不煩天討是王之功也次則有薛郎
逐出周寶自據東方南襲毘陵西侵建鄴恣其剽掠務
在殺傷將取中國之危擬扼長江之險王乃命二麾上
將期一月報功指其山川授以韜略蹄轂並舉水陸兼
行曾不旬時討平穴裏俘南宮萬於犀革視以囚人梟

崔慧景於鱸藍張其叛否是王之功也次則有徐約比
是六合鎮使遽忝三吳都符玉帛是求徵斂無度長時
習戰齊民因彼雕黥比屋為軍魯儒亦遭剪刺惟王聞
其暴虐奮激神威發上谷之精兵命下江之賢將授以
九天九地之訣博以訓辭典謨之規扼斷咽喉清其郊
野任約之龍果睡王彌之豹徒飛食寤朝饑無由撫土
計窮宵遁遂至潰圍松陵之烟水重清香徑之黎元再
活是王之功也次則有孫儒恃有數百萬兵甲不守淮

南直欲便遷土疆遂奔江左封人氏為糧食藁舍宇為
薪蘇餓鵲饑鷹飛揚京口貪狼乳虎涉踏吳門漸逼由
拳將窺雪水王乃張天網於險阻闢地穿於要衝發水
犀之驍雄設燧象之奇計青鶴摩壘亦免致師將持久
以待之俟勢窮而必取守陴皆哭無食何為鳴鼓而攻
脫身遂去向使不施神略不振王威則翼翼聚靈皆成
膏血茫茫勝槩盡作爐煤所謂劬勞為時廣大及物是
王之功也次則有董庶人始鎮石鏡便牧於杭因破漢

宏遂居越土自形成象從纖至洪並是王之擐甲執兵
左提右挈以至手持麾節身爵王侯既滅項於彛倫乃
垂涎於神器銅符金匱祥瑞亂興玉璽珠袍妖訛競起
王以早同楚軟夙共晉盟書尚緘膝血猶濡劒牋函旁
午誘勸交馳諫既閑於屬垣禍遂成於覆族是時兩河
崛起三輔紛紜萬象雖拱於北辰一人不遑於南顧王
請奉行天討所統便是國兵不廢公供資財不役諸道
將帥果見桓玄計窘抽王道以求生王莽勢窮轉神威

而壁勝喉既扼於富水骨復棄於會稽渚厥故宫焚其
法物復我朔清俄寰瀛海五石補而天鏡明六合完而
地維正是王之功也王以平妖立霸時之業戡難建蓋
世之功律呂宮商鏘洋史籍丹青金玉煥爛國華所以
僖宗天子仰我文昭睠我武烈龍光壓壘急使星馳綸
綍便蕃大玉風起尋以耿純試理盧植兼才披錦衣以
耀家鄉握珪符而光松梓洎於昭皇飛升大寶禮遇元
勲龍悅居雲鳧忻得藻嘉功賞德金鳳之詔連飛表異

旌優玉麟之符遂刻移南徐之藩翰就錢塘之江山節
竦靈犀帳開神虎三千珠甲光爛星辰十二牙旗文生
組繡碧幢纔建黃閣斯登乃兼鎮於越藩遂對封於漢
節中天呈象雖分牛斗之疆夾岸烟嵐映出東西之宅
四縣既食萬戶累加祭戟立門赤油羅列山河誓券丹
宇瑩煌生祠之籟豆鏘鏘衣錦之城隍黯黯而又特逾
漢制封我吳王茅分夏社之鄉桐剪周王之手昔也龍
蛇起陸蹈湯火以戰爭此際山川出雲見君臣之際會

迨夫濟陰王既傳天寶梁太祖遂應元苞於王不易范
張之故情許結秦晉之嘉好恨無殊禮得展異恩於是
追呂望之高風擬山甫之美躅師尚父統攝三都作帝
股肱尚書令總務萬機為天喉舌仍頒瑞節復踐高壇
建牙兼領於揚州分閭遙臨於楚甸尋命兵部姚尚書
躬持鳳策遠泛鯨波備周官之典儀封越國之土宇八
鸞四馬耀鏤錫以振鉤膺三節一王秉桓圭而垂元玉
及龍德嗣君即位禮稱伯舅尊曰父師寅茲烈光虔奉

顧命時遣吏部李尚書捧持綸誥諭曉湖浙受天下兵馬都元帥昔韓信對高祖曰陛下能將將臣能將兵是知元帥非人臣之職曹蓋帝王之兵柄推於前代隋煬帝自晉王淮南行臺尚書令而行軍元帥無天下之號國朝肅宗皇帝駐蹕靈武因命代宗皇帝自廣平王而為之德宗皇帝自晉王而為之梁太祖受九錫後而為之斯天下為元帥之故實其後龍德帝復命兵部崔侍郎齎持簡冊浮泛風帆揚往典於明庭促及時而建國

奉召康公之命得以專征授康叔虎之封良由吉夢未
久金行運息土德中興莊宗皇帝鵬起并汾龍飛宋汴
當宁不踰於旬朔臨軒寅謝於公卿曰吳越國王五十
年來常作撐天之柱三千里外每為捧日之雲今茲將
致小康實在敬尊元老於是鸞臺進擬麟趾摘詞典瑞
獻功琢白珪而冊文燦爛職金供命鎔紫磨而印篆盤
珊重封吳越國王再授天下元帥馬遷十代史內固是
絕倫柳晉萬卷書中必無往例其建國也大君有命明

試以功自癸未而至壬辰備戰器而修王道先是中朝
名邑在野遺人或負笈檐簷來投霸府或拆襦為袴而
詣軍門奮揚於嘉物堂中曳履於靈鈞臺上至此水鏡
裁鑒金冊錫封並列庭臣皆居省署簪裾列傳文物高
光張伯儀陳宗廟之儀鄭子產獻公侯之禮豈謂難窮者
大數莫究者彼蒼俄脫履於具區遽懸輟於正寢金山
霧掩誰知帝召王喬玉海波空惜痛神辭李廣况十三
州疆場百萬姓黔黎咸長養於恩膏悉生成於化澤淚

灑而晴光散雨愁凝而杲日沉雲鳥獸悲哀草木慘怛
明宗皇帝宣太常而定謚法詔二卿而撰誄文鸞輅龍
旂贈典優於鄧禹梓宮黃屋異數等於霍光得謂盡始
盡終極榮極貴享九九之仙壽近帝位於一爻合萬萬
之人心歆神道於千祀有後如此又何缺焉我天下兵
馬元帥吳越國王當燕族之多奇承趙宗之後世嵩衡
泰華秀氣俱騰海濟江河榮光共結是時嗣主誕我國
祥紹經文緯略之基襲積德累仁之業開襟奮臆仗

雄傑於周瑜誓衆臨戎統豪人於張袞風儀則懸星溢
目紫電揚矚霜雪凝肌魚龍入髮仙應有分貴不可知
宋升聲姿尤閒進對竇融詞氣惟是卑恭加以青雲常
在於言談畏日不離於顧盼徐行緩步褚彥回却是趨
蹌欹幘斜簪王文憲殊非蘊藉智畧則鮑叔雖矢應手
而成德業則顧和珪璋遇機方露遠者大者一剛一柔
靜則心照鏡而貌懷冰含和六氣動則火炎山而湯湧
海懼懼萬人機變則管荀才高孫吳術妙身文虎豹變

見不常義府戈矛短長迭用三雋才既為已任六奇策
固無是遺卻穀詩書經綸國計項羽雷電振動兵籌徐
睎而莫測金泉旁窺而罔知珠岸詞藻則清霜皓月絡
繹綵箋芳草落花飄揚鏤管織成夢錦散出神霞英變
屢奇張融之言信矣凌顏爍謝元葉之論宜然札翰則
早受義方曾傳掣筆驚回鵲返氣勢驚人金錯銀鈎縱
橫入木紫牘無非筆陣宮寺爭耀寶牌崔宏之本草無
光張育之柳蒲失色立功則我王初離太學始統親兵

郭太子方欲平齊汝陰王乃思安漢屬鄰國侵軼命將
曰李濤僅二萬兵下百里砮圍逼安國涎喙餘杭我王
虔誠訓辭遂升上將凌風授武黃石傳書親蒙韓奕之
黃熊躬仗封丈之白虎攻東南而畧西北事在機先掩
五壘而出三門別馳神算於是斬摧大陣擒獲萬人道
路隘於俘囚山川積於戈甲餘敵作氣既竭方遁於於
潛我則乘勝追逐又奔於廣德未出一百里之境復降
五十乘之戎唱凱歌而喜氣連郊整班師而雄風掠地

尋即大統龍艦遠征鼇溟巡江陰而收東州入海門而
觀北固彼境遂陳舟楫遠出枝梧我則陳二廣於浪港
沙前設三覆於石牌灣內零陵石灰風便爭投於蛟蜃
窟中沁水火棧油燃盡葬於鯨鯢腹裏一戰定霸二紀
無虞寰海具瞻將相迭耀聲光丕顯裴松為廟廊之人
功業昇聞段襄居骨鯁之任爰自承嗣國構纘奉王基
况當跪前之初又在寢苦之內芝蘭龍鳳三千餘口之
家風鐵石虎貔二十萬人之軍府誠難撫御豈易輯綏

我王以孝為模用仁作範無所不可唯言是從嘉惠寵
靈供承花萼油雲膏雨潤澤閭門此外習武益兵輕刑
謹罰德無脛而遠屈名無翼而遐飛果動大朝繼鍾異
寵三年之內兩策連封雙龍之金節齊行四馬之寶車
並驟玉貝冠劍見王者之尊崇織文旂裳覩國家之貴
盛我王因茲顯赫益動孝思無以答先祖之恩無以報
昊天之德且曰武肅王有大功及天下大名振寰中庇
生民則百萬有餘築城壘僅五十來處豈可不建廟貌

不像真容為星紀之福宮作地戶之神主爰命興武中
直都虞侯姚敬思於馬臻湖畔勾踐城中選閭閻形勢
之中區得顯敞高平之勝址於是楸杵俱下畚鋤齊興
隱隱雷聲轟轟嶽震不十旬而展役匝千丈之隆基大
梓文枿匪匠自泰山伐得宏梁巨棟匪神由漳水漂來
雕鐫者王母天圖甃砌者赫連繡石斤揮斧運削出銀
葩水鑿沙磨方成玉碣符元玉之嘉兆應神著之吉辰
始乃架險梯虛雲構山屹陰虬回抱陽馬奔趨虎牙衡

而枿拱連龍脊裒而欒樞轉瓊瑤耀複道丹壁漆明簷
鴛鴦之瓦縫界成芙蓉之磚丈印出則以丙辰歲秋八
月十有七日我王具鹵簿鼓吹車輅旂裳北司侍臣南
班舊列奉迎真像而入祠宮白檀雕出聖容黃金鏤成
寶座儀刑酷類神彩如生鳳目龍章顏猶不改垂旂被
袞人見興悲禮器則俎豆犧樽軒懸則祝敔鐘磬後殿
翟衣雉服父母賢妃露幔珠屏蝦簾象榻不異昔時秘
寢皆同曩日深宮前則廣厦交陰芳亭對構紫石伏狻

猊之影朱欄交菡萏之光正啓重門並立神將侍衛兵
仗矛戟森然文武官班簪裾肅立直出甬道千步有餘
河枕投醵波通射的蓮芰遠於水閣銅柱夾於星橋左
則圍抱粉廊連延綺棟並圖曹署各列司存乃至早世
勲官無祿公子皆塑儀像並配薦羞右則修廡飛甍綠
牕丹牖神兵儀馬見雷電而沒風雲明竈淨厨備棗盛
而享肥腴景物則高彩矮繪粉竹金松夾砌名花連階
瑞草烟嵐蒨蔚梗暹陰宮雲霧朦朧居然神府我王昔

以致君之業累珍寇戎今立顯考之祠而修孝敬所以
天朝繼封王爵以耀國章統帥天下侯伯卓絕殊勲洪
業所謂災地熏天書剡谿九萬之牋不能盡紀勒華山
五千之仞亦恐難窮光業詞不夢於王椽才匪量於曹
斗擬奚斯之頌或恐麤心對豫章之牖豈合措手但以
二紀幕客千載庭臣不求孫綽擅名豈望楊修絕筆所
希編述周答恩光爰感先王恭為銘曰

崧高嶙峋是生哲人天上獅子出澤麒麟錢樽殷俎剗

引唐臣衣冠表裏文武經綸廣運將新大盜斯起雁象
歛驚鳬毛亂委紫蓋蒙塵黃巾多壘既戮憲章又裂文
軌武肅英王提劍東方龍行雲雨虎變文章字氣沃酒
妖雪歸湯洗滌星馳整頓天常計功彤庭圖形麟閣桐
桂連編芳土續索三道犀幢八朝鳳幄丹券家門錦衣
城郭元帥天下國土具區六瑞琢冊三品鑄符尚父四
履尚書萬樞峻我高壽曦赫霸圖我王奉天為時而出
傳寶應金繼明昭日國士無雙風華第一削樹平戎夢

天受秩功既挺世德義動天襲封二冊嗣位三年金印
國寶元帥兵權忠無瑕類孝絕雕鐫未褫墨線乃建清
廟卧龍之東會稽之要嵐界迴廊粉明周繚廣殿露開
重門岳峭瑞玉禮器香檀聖容民之祀主我之神宗秉
翟執籥持鼓編鐘燃蕭燔胖冥幣輸宗於穆祠宮煥為
陰府五齊恒馨六佾常舞餉薦房蒸歌隨路鼓令子懿
孫光今顯古

浙江通志卷二百六十五